

[www.BibleForChildren.org](http://www.BibleForChildren.org)


# Matiu 1



Dud naningamben desirom danave, God aneyaeba  
Gebrieru baraune Nasaret aine. Me gwetoimu Gariri  
danave. Otau me apan iviwa Josep autan oya yapapara  
aya. Josep me Devid dam meuma yaig onnewa. Otau  
iviwa me Meri.



Megara aneya me gumbé wane, "Meri,  
a den a. God baigan meuma ge  
auwana. Ge bug a, sira ud apan  
yaipe. Ge iviwa ug yuwa me Iesu.  
Me iviwa koka ape. Iyayapan  
wape me Apan Kokawa  
Painauvitwa Usiwa. Ayapan  
God me wampe mamawa Devid  
kin arawa aupe. Me Jekob gweyawa  
yaibobot amarape viripusiwa onan.  
Kin at meuma onan den di ape."



"Aninin mame ape? Ne apan den  
yaug anona." Meri singui wane.  
Aneya garawa wane, "Guwawa  
Iyakaisiyapama gungap uwape.  
Apan Kokawa Painauvitwa  
yusiwa meuma ge um  
gempe. Meve me  
yaipewa, iyayapan aib  
wape, me Apan  
Iyakaisiyapama,  
sira me God  
Usiwa."



Me kumive Meri tam yoig at kokawa me tui arawa Judia oya tatevit aine. Me Jakaraya gweyawa unig aig, me gaun meuma Erisabet wanne. Erisabet Meri gaun meuma anonewa, kikiyan inawa danave tupit dodne. Erisabet me demtawa aune Guwawa Iyakaisiyapama gumbe. Noiwa kokavit wane, "Vesin yapowo waribiya genne. Ud inawa danave wakenewa me mina



waribiyane."



Mame me Iesu Keriso aninin yaig onnewa.  
Me inawa Meri Josep gaibu  
yapapara aya, sira mu  
memgebip oya amareme  
kumiwa apa, Guwawa  
Iyakaisiyapama gumbé  
me bugane. Megara  
Josep taibe me  
kwetan den anone,  
kuiyawa me apan da  
oraimina, meoya me  
imidanave me guwave  
kwepe aipe.



Megara Josep mameib yang anoiviwa, Ayapan aneya meuma uyavi gumbé uwag dig wane, "Josep, Devid usiwa, Meri biyugwa aug gwe aga a den a, kuiyawa me kikiyan gumbewa Guwawa Iyakaisiyapama gumbé wanedne. Me urapan yaipe, sira ge iviwa ug Iesu yua, kuiyawa me iyayapan meuma kukaeba emewa waita mumpe."



Josep kub gumbe wan yoine, sira Ayapan aneya  
meuma aninin wanewa me ane, sira biviwa aune.  
Megara me gaibu den nag vinne,  
namu me urapan kikiyan baraune,  
sira me iviwa ug yune Iesu.





Kum me danave Siisa Augustus gaiyawa iyayapan undag dirumne, iyayapan at undag danave agoniyape ivuwa tetan oya. Iyayapan undag at kokawa muma gumbe ivuwa tetan oya amiya.



Meoya Josep mu mina gaibu, at kokawa Nasaret me  
Gariri danave wakenewa dauwag Devid arawa kokawa  
Betureem me Judia  
danave wakenewa dog  
aine. Kuiyawa me  
Devid dam



meuma desiroma.



Me Meri gaibu ivuwa tetan oya asime amiya. Meri me gaibu mem atan oya me gumbe yapapara ane, sira me ud autan oya amaraivi.



Mu asime wakeyawa  
kumive, ud kikiyan  
yaitanwa kumiwa uwane.



Me ud apan namu meuma baraune. Me wape gumbé  
panne sira yoma kabum kwapiyawa me danave  
baraune. Kuyawa gwe kokawa  
iyayapan vinemewa danave  
mu at onan oya.



Sira at megiyave wayo arawa apa sip amareme igiyawa  
mu daieve wakeya. Arampuna mu den kubvineme mu  
sip muma amareme. Ayapan aneya  
meumawa mu gumbo  
uwane.



Ayapan eyawa meuma mu gumbo birorot esinewa, mu a  
aya. Megara aneya mu gumbo wane, "Ye den a aya.  
Ne gae oraiwa aug onedna. Me

degadega kokawa iyayapan

undag

munan Gare

mame Devid

arawa kokawa

meuma

danave Waita

Abnawa me

yen an yaine."



"Me Keriso Ayapan. Mame me ye irayauyau yeuma.  
Ye kikiyan yauya. Me wape gumbé paniya yoma kabum  
kwapiyawa danave barauya vinivi."





Pungi den wane, kwiminaw mut igiyawa abototoi aneya gaibu uwaya, sira God waiya ag waneme. "Painauvitwa danave eyawa God gumbe. Piyuwau



iyayapan mu  
me meumawa  
yum gumbo."



Aneya yankwem kwimin danave dog  
amiyawa, sip amaremewa garawa ano aya,  
"Betureem anta, sira mame matadnewa  
yauta, Ayapan me oya wag did nunnewa."



Meve mu tatevit amog Meri ge Josep yawamiya. Mu kikiyan me kabum danave viniviwa yauya. Mu yauyawa, ud mame oya wait dirumiyawa mu gae wateteyamiya.



Iesu Betureem at  
Judia danave  
yainewa kumive,  
kin Erod kumiwa  
apa, ano  
koukawa

igiyawa kum dauwaiviwa apa  
onam at Jerusarem uwaya,  
sira waya, "Ud me Ju igiyawa  
kin muma atan oya yainewa  
ampa wakene?"





“Kum dauwaiviwa  
apa nu marantun meuma  
yautu, meoya nu waddega  
wantan oya onantu.”



Meve kin Erod ano koukawa  
igiyawa munan guwave  
auwane, sira mu gumbo  
kum divi marantun me  
dauwane yang anone.  
Me mu temunne at  
Betureem amiya. Me mu  
gumbo wane, "Aisiya sira ud  
kikiyan oya yaimoyai diuya.  
Me yauyawa, tatevit  
didnegiya anotna,  
meve ne gaibu  
aneg me  
waddega  
wantna."



Namu mu kin aninin wanewa anog amiya, yauya, mu marantun me kum dauwaiviwa apa yauyawa namuwon aiginke, at me ud kikiyan wakenewa apa tumag yoine. Gwe dana unig amiyawa, mu kikiyan inawa Meri gaibu yawamiya.



Sira mu me kwanowa poyag petat ag waddega aya.  
Meve mu dividivi oraimumu mumawa watapiya, sira mu  
puyo waniya: gooru ge tayawa  
oraiminawa ge gegura maaru.  
God uyavi gumbe dirum wane  
kin Erod gumbe den taig  
aisiya, meve at  
muma sira taig  
ebu ube amiya.





Mu taig amiyawa, yauya,  
Ayapan aneya meuma uyavi  
gumbe uwag Josep dine,  
"Wan yoiya, arampuna ud ge  
inawa tama, sira yankwek at  
Ejipt a guwawe aisiya,  
sira asime wakeya meve  
ne watna anoa, kuiyawa  
kin Erod ud yang aug


toinguttan oya aivi."





Meve me wan yoig ud ge  
inawa arampuna tam a  
guwave at Ejipt amiya, sira  
asimeve wakeya, meve kin  
Erod boane. Meoya propeta  
gumbe Ayapan wanewa  
natawa uwane. "Ejipt  
apa ne utunwa auwana  
dauwag onne."



Kin Erod yang anone ano  
koukawa igiyawa ugai waniya,  
meoya danawa piriwane, sira  
me dirumne urapan at  
Betureem apa wakeyawa undag  
gutpe, sira gwetoimu megiyave  
wakeyawa gaibu undag gutpe.



Mu bairawan muma duwam  
ge ankwatavewa. Me  
bairawan me ano koukawa  
igiyawa gumbo yang anone.



Kin Erod boane, meve Ayapan  
aney a meuma uyavi danave  
Ejipt apa Josep uwag wane,  
"Wan yoiya, ud ge inawa  
tam at piyu Isuraeru  
aisiya, kuiyawa  
iyayapan mu ud inaiinai  
meuma autan ayawa  
wait boriruwaya."




Megara me anone Akeraius me mamawa kin Erod  
at meuma aune at  
Judia amaraivi, me  
asime aitanwa a ane.  
Uyavi danave  
God



gwanwan dine, meve me  
at Gariri amiya, sira me gwetoimu me at  
iviwa Nasaret amog wakeya.



Meve propeta gumbé  
wanewa natawa  
uwane: "Iyayapan me  
Nasaret apan waya."



God baigan meuma kokavit at  
piyu mame gumbe, meoya me  
Usiwa Desiromiren munne. Bira  
da me gumbe anotumat  
apewa me bo den ape  
inaiinai yaibobot  
aupe.





Romu 3:23 Iyayapan undag kukaeba aya, meoya God gumbe mu oma den ane eyawa aupe.

Romu 6:23 Kukaeba garawa me bo. Megara God puyowawa me inaiinai yaibobot me Ayapan numa Iesu Keriso nuniviwa.

Ibru 9:27 Iyayapan undag kum da boriruwata, sira pui auta. Me natawa.

Epesas 2:8,9 Ye ano oraiwa gumbe sira anotumat yeuma gumbe waita auyana. Ye yembovit onan, me God puyowawa. Nau gumbe onan. Me bira da den waiyatan oya.



Romu 10:9,10 Kuiyawa ge nogap, "Iesu me Ayapan,"  
vegewa, sira nonegap, "God ane Iesu boriruwayawa  
igiyawa gumbo sira inaine," anotumat egewa, ge waita  
auwa. Apan nonenmagave anotumat apewa, God namive  
oraiwa aupe. Sira noiwa gumbe taibe waiviwa waita aupe.

Jon 3:16,17 God baigan meuma kokavit at piyu mame  
gumbe, meoya me Usiwa Desiromiren munne. Bira da me  
gumbe anotumat apewa me bo den ape inaiinai yaibobot  
aupe. God piyu mame pui yutan oya Usiwa den baraune  
onne, me piyu mame me gumbe waita muntan oya.

1 Jon 5:11-13 God inaiinai yaibobot aug nunne, sira  
inaiinai mame Usiwa gumbe wakene. Mame me taibe  
atanwa. Da bira me Usiwa aunewa me inaiinai aune, sira  
da bira God Usiwa den aunewa me inaiinai den aune.  
Ye God Usiwa iviwa gumbe anotumat ene, meoya ne  
dividivi mame yenan teeni, me inaiinai yaibobot wait  
auyanawa ye yaug anotan oya.



Matiu 1-2; Ruk 1-2

Storyline by: Edward D. Hughes

Illustrated by: M. Maillot  
and Alastair Paterson

Adapted by: E. Frischbutter, Sarah S.

Maiwa NT (mti) © 2011, Wycliffe Bible Translators, Inc.  
All rights reserved.

<https://www.bible.com/bible/360/MAT.1>

©2024 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

